

մէջ, ազատ և շռայլ կեանք մ'անցընելով հոն: Այդ յոռի սովորութիւնն ալ կը պախարակէ սուրբ հայրապետը և կը սպառնայ որ «թէ իցէ որ՝ որ յանդգնեսցի առնել, ի կարգէն իւրմէ դադարեալ լիցի՝»:

9. — Սովոր էին դարձեալ քահանայք՝ առանց ո՛ր և է հարկի՝ շինականներուն տուները տանիլ Ս. Խորհուրդը և հոն հաղորդել զիրենք: Այդ անպատեհ սովորութիւնն ալ կ'արգիլէ, թոյլ տալով որ միայն ծանր և օրհասական հիւանդներուն տարուի՝ ամէն պատշաճ յարգանքով և երկիւղածութեամբ՝ զիրենք հաղորդելու¹:

10. — Պատկի խորհուրդն ալ իր սրբութեան, բարձրութեան և լրջութեան մէջ պահուած չէր: Քահանաները թեթեօրէն կ'օրհնէին անխելահաս տղոց և աղջիկներու պսակը, որոնք անգէտ տակաւին իրենց վիճակին պարտականութեանց և առանց իրարու փոխադարձ հաւանութեան, լոկ ծնողներուն ստիպումով կ'ամուսնանային, որով կ'արհամարհուէր խորհուրդը և ծանր հետեւանքներ առաջ կու գային: Սոյն բոլոր խորհրդածութիւնները կ'ընէ Ս. Սահակ իր կանոններուն մէջ և կը պատուիրէ քահանայից, «Տղայոց ամենեւին իսկ պսակ մի՛ օրհնէք մինչեւ ի կատարումն հասակին. իսկ կատարելոցն՝ որոց չիցէ զմիմեանս տեսեալ... պսակ մի՛ իշխէք դնել առանց քննութեան և զնոսին ինքեանս հարցանելոյ... իսկ թէ որ ի քահանայից յանդգնի և արտաքոյ մերոյ հրամանի այնպիսեացն պսակ օրհնեսցէ, զիտացէ զի քահանայն պատուհաս կրէ ըստ օրինակի վնասակարացն²»:

11. — Ինչպէս ժամանակով Ս. Ներսէս խստիւ արգելած և գրեթէ ջնջած էր այն հեթանոսական սովորութիւնը, որով՝ մեռեալներուն յուղարկւորութեան առթիւ՝ կը չափազանցէին եղբրամայրերը իրենց լացն ու կոծը, մազերնին փետելով, զգեստնին ձրձելով, — և թաղումէն վերջը՝ ներհակ

չափազանցութեամբ՝ կ'ուռէին, կը խմէին, կը պարէին, — կը շարունակէր այդ սովորութիւնը մինչեւ Ս. Սահակի օրերը, որ կը սաստէ ու կ'արգիլէ, թէ «գինրմպելիս ի լալիս մի՛ արասցեն, աշխար ի վերայ մեռելոցն մի՛ որ ապցէ, քանզի դիւական են ամենայն այդպիսի իրք³»:

12. — Ս. Սահակ իր կանոններուն մէջ, ո՛չ նուազ անաչառ և շահեկան խրատներ և յորդորներ կու տայ նաեւ վանականներուն, իրենց կարգին համաձայն սուրբ վարք մ'ունենալու, հրեշտակօրէն ապրելու, իրենք զիրենք եղբայրսիրութեան և օտարսիրութեան նուիրելով, փախչելու երկրաւոր և աշխարհիկ հաճոյքներէ, պարապելու միայն Աստուծոյ և աստուածային իրերու և ամէն առաքինութեանց օրինակ ընծայելու իրենց անձը⁴: կը խօսի դարձեալ մանրամասնօրէն անոնց պարտականութեանց և իրաւունքներու մասին, ինչպէս նաեւ այն նուէրներուն վրայ, զորս կու տար ժողովուրդը ի նպաստ վանքերուն ու եկեղեցիներուն, թէ ինչպէս արգարօրէն և հաւատարմարար պիտի բաշխուէին անոնք իւրաքանչիւրին արժանիքին, իրաւունքին և պէտքերուն համեմատ:

13. — Ի վերջոյ վարդապետօրէն կը խօսի ծէսերու, արարողութեանց և կրօնական հանդէսներու վրայ, — եկեղեցիներու, ժողովրդանոցներու և հիւրանոցներու մասին, բացատրելով համառօտիւ անոնց հաստատութեան նպատակը: կը թուէ մի առ մի տարւոյն զխաւոր տօները, լուսաբանելով անոնց խորհուրդներն ու յիշատակները, և յորդորելով որ սուրբ պահեն այդ օրերը, կատարելով իրենց հոգեւոր պարտքերը և տալով՝ ըստ իւրաքանչիւր կարողութեան՝ իրենց նուէրները ի նպաստ վանքերուն ու եկեղեցիներուն:

Այս և նման կանոններով ու խրատներով՝ լիովին յաջողեցաւ Ս. Սահակ վերանորոգել ու պայծառացնել հայկական

1. կանոնք Ս. Սահակայ. ժ. էջ 93-94.
2. Անդ. ժ.Ֆ. էջ 94.
3. Անդ. ժ.Ե. ժ.Ձ. էջ 95-96.

4. Անդ. ԻԱ. էջ 98-99.
5. Անդ. ԻԳ. էջ 99.